

Francamente

Scirbi pa Frank Edwig Burke

No a costo di tur cos.....

Prome cu tur cos: mi tambe ta yama bon bini na CITCO pa habri e refineria pasobra lo crea mas puesto di trabou y tambe mas entrada pa gobierno tanto directo como indirecto. Pero mi mester pone algun pregunta tras di e intencionnan di CITCO, manera: si e refineria ta worde solamente usa como “blender” pa haya mihor prijs pa crudo venezolano ariba Mercado internacional of si lo haci tambe e inversionnan necesario pa produci fuel-oil (pa WEB), diesel, gasoline y jet-fuel.

Mientras cu negociadonan di gobierno, CITCO y Valero ta poniendo “puntjes op de I” prome cu bai over na firmamento di e contratonan nos mester reza pidi Dios cu e derechonan ambiental di pueblo di Aruba lo worde respeta? Si nos mira cu na Corsow PDVSA a worde sentencia pa paga miyones di florin na danjonan ambiental y cu e lago di Maracaibo ta pata pata di crudo pa falta di inversionnan den mantenimiento di e equiponan di perforacion di suelo, nos no por laga di teme cu CITCO por presenta cierto peliger pa nos salud ambiental.

Nos mester tene cuenta cu un anja pasa expertonan financiero di Gobierno Venezolano a sugeri pa bend CITCO pa asina alivia e peso di deuda internacional cu ta presiona e pais economicamente. Pa motibonan politico (no por bende patrimonio di pueblo) Presidente Maduro a scoge pa no bende e compania y tambe pasobra CITCO ta trahando mas eficiente cu PDVSA cu tin miles di hende di mas ariba su payroll.

Henter e proceso di negociacion relaciona cu eventual apertura di e refineria mester worde teni for di e tereno politico pasobra Gobierno ta na punto di tuma un decision di importancia trancedental. No por negocia bou di presion politico pasobra tin un oposicion cu ta cla pa manifesta violentamente si no yega na un acuerdo. Un acuerdo cu no ta un garantia pa un contrato di minimo 10 anja y cu ta responsabiliza CITCO pa eventual danjonan ambiental no ta un acuerdo cu nos pueblo merece.

Nos ta pasando door di temponan dificil pero ainda nos no ta muri di hamber di manera cu no tin nodi di bai na rudia pa ningun compania. Al contrario ta CITCO mester di e refineria pasobra pa motibo di e deudanan atronomico di gobierno Venezolano no por sigui inverti den e “upgraders”nan den e region di Orinoco. E crudo venezolano ta hopi diki y manera cu e ta ariba Mercado internacional e bal 5\$ menos cu e otro tiponan crudo.

No ta Mike de Meza ni Glenbert Croes of Andin Bikker ta e heroenan cu ta habri e refineria sino ta e prijs di crudo mas abou den ultimo decadanan ta e factor cu dura e refineria balor. Pesey nos tur mester ta alerta pasobra ta bon pa habri e refineria pero no A COSTO DI TUR COS.....